

समे – 12:25

<><><><><><>

PM Kuwait Visit

प्रधानमंत्री नरेन्द्र मोदी होर 2 दिन दी यात्रा पर अज्ज बडलै कुवैत लेई रवाना होई गे न। रवाना हाने कोला पैहले अपने इक ब्यान च मोदी होरें आखेआ जे दौनें मुख्यें बश्कार एतिहासिक सरबन्ध केइएँ पीढ़िएँ थमां रिश्ते गी मजबूत करदे आए न। उनें आखेआ जे दौनें मुख्यें बश्कार भयाली छड़ी बपार ते ऊर्जा दे क्षेत्र च गै नेई सगुआं पंछान एशिया च रमानदारी ते खुशहाली बनाई रखने दे हित्त बी दौनें मुख्यें दे सांझे न। प्रधानमंत्री हुंदी एह यात्रा कुवैत दे अमीर शेख मेशाल अल तबर अल सबाह हुंदे साददे पर होआ'रदी ऐ। इस दरान ओह कुवैत दे नेताएं कन्नै गल्लबात करगंन। मोदी होर इक कार्यक्रम च भारतीय समुदाय दे लोकें कन्नै बी गल्लबात करगंन। ओह इक श्रम शिविर च बी जांगन। ओह कुवैत दे अमीर दे खास मेहमान दे तौर पर 26में अरेबियन खाड़ी कप दे उद्घाटन समारोह च शामिल होंगन। प्रधानमंत्री होरें गी बायन पैलेस च गॉर्ड ऑफ ऑनर दित्ता जाग। एहदे मगरा ओह कुवैत दे अमीर ते क्राउन प्रिंस हुंदे कन्नै प्रतिनिधि मंडलें सतह दी गल्लबात करगंन। पिछले 43एं ब'रें चकुसै भारतीय प्रधानमंत्री दी कुवैत दी एह यात्रा होग। कुवैत इसले खाड़ी सैहयोग परिषद दा अध्यक्ष ऐ ते प्रधानमंत्री हुंदी इस यात्रा कन्नै दौनें मुख्यें दे छड़े दपक्खी सरबन्ध गै मजबूत नेई होंगन सगुआं खाड़ी क्षेत्र कन्नै भारत दे सरबन्ध होर बी बधगंन।

<><><><><><>

GST

माल समेयान ते सेवाएं सरबन्धी टैक्स जीएसटी परिषद दी 55मीं बैठक अज्ज राजस्थान दे जैसलमेर च होग, जेहदी अध्यक्षता केन्द्री खजाना मंत्री निर्मला सीतारमण होर करगंन। इस बैठका च जीएसटी सरबन्धी मुद्दें पर चर्चा होग जेहदे च गोवा, हरियाणा, जम्मू कश्मीर, बिहार, राजस्थान सनें केई राज्यें ते केन्द्र शासित प्रदेशों दे मुखमन्त्री ते उपमुखमन्त्री हिस्सा लेंगन। तोआई खजाना मंत्री होरें कल संजा बक्ख-बक्ख राज्यें ते केन्द्र शासित प्रदेशों दे खजाना मंत्रिएँ कन्ने जैसलमेर च गै इक बैठक लाइयै 2025-26 ब'रे दे केन्द्री बजट दे

सरबंधै च उंदे नै सलाह सूत्र कीता। बैठक च जम्मू कश्मीर, गोवा, हरियाणा, मेघालय, राजस्थान ते मध्यप्रदेश दे मुख्यमंत्री बी मजुद हे जिनें इस बारे अपने सुझाह बी दित्ते।

अज्ज लगने आली बैठक बारे गल्ल करदे होई मुख्यमंत्री उमर अब्दुल्ला होरें आखेआ जे केन्द्री खजाना मंत्री हुंदे कन्नै एह बैठक जम्मू कश्मीर दे बपारिएं, कारोबारिएं, दस्कारें ते कारीगिरें दिएं दिक्कतें जरूरतें गी उजागर करने दा शानदार मौका ऐ ते मेद ऐ जे जम्मू कश्मीर दिएं माली चिंताएं गी दूर करने ते एहदे पूरे पराते विकास गी जकीनी बनाने लेई औंदे बजट च ते कन्नै जीएसटी बवस्था च जरूर किश ना किश कीता जाग।

<><><><><><>

World Meditation Day

अज्ज पैहला पैहला विश्व ध्यान दिवस मनाया जा'रदा ऐ। संयुक्त राष्ट्र नै 29 नवम्बर 2024 गी अपनी महासभा आस्सेआ पास कीते गेदे प्रस्ताह च 21 दिसम्बर गी विश्व ध्यान दिवस मनाने दा फैसला लैता हा। "ध्यान लाने ते एहदे फायदे बारे दुनिया भरै च जागरूकता बधाने लेई, भारत ते किश होर मुख्य दे सुझाह पर एह फैसला लैता गेआ ऐ। एहदा मकसद दुनिया गी शारीरिक ते मानसिक सेहत ते जीवन भर तंदरुस्त रौहने लेई नियमित तौरा पर ध्यान लाने लेई प्रेरत ते जागरूक करना ऐ। संयुक्त राष्ट्र आस्सेआ लैते गेदे इस फैसले कन्नै ना छड़ा दुनिया भरै च शारीरिक ते मानसिक तंदरुस्ती हासल करने बक्खी लोकें दा रूझाण बधोग, सगुआं दुनिया गी दरपेश चुनौतिएं, जियां जे हिंसा, तनाव ते समाजी गतिरोध मतभेद बगैरा कन्नै निबड़ने च बी मदद थोग।

<><><><><><>

Softball

जम्मू कश्मीर दे युवा सेवाएं ते खड्ड मंत्री सतीश शर्मा होरें कल जम्मू दे एम.ए.स्टेडियम च 37में ओपन सब जूनियर नैशनल साफ्ट बॉल चैंपियनशिप दी घोषणा कीती। इस प्रतियोगिता च 24 राज्यें थमां 38 टीमें हिस्सा लैता ऐ। जेहदे च 1 जहार शा मते खडारी ते तकनीकी अधिकारी हिस्सा लै करदे न। इस कार्यक्रम दा आयोजन जेएंडके साफ्ट बॉल एसोसिएशन आस्सेआ जेएंडके स्पोर्ट्स काउंसल दे सैहयोग कन्नै साफ्ट बॉल एसोसिएशन ऑफ इंडिया दी अगुवाई च कीता जा'रदा ऐ। कार्यक्रम च बोलदे होई मंत्री होरें आखेआ जे जम्मू कश्मीर च ऐसी बड्डी प्रतियोगिता दा आयोजन ते मेजबानी करना बड़े मानै आली गल्ल ऐ। उनें

खडारिएं ते अधिकारिएं गी बधाई दित्ती ते जम्मू कश्मीर गी खेड़ें दी उत्कृष्टता दा केन्द्र बनाने लेई सरकार दी प्रतिबद्धता गी पही पक्का कीता।

<><><><><><>

Winter Break

सरकारै कश्मीर प्रांतै दे सब्बने ते जम्मू प्रांतै दे सयाले आले जोनें हेठ पौंदे सब्बने कालजें च 27 दिसम्बर थमां सयाले दिएं छुट्टिएं दी घोषणा करी दित्ती ऐ। एह् छुट्टियां 14 फरवरी तोड़ी रौहगंन। एह्दे कन्नो कन्नी सरकारै जम्मू प्रांतै दे सोए आले जोनें हेठ पौंदे सरकारी डिग्री कालेजें च 1 जनवरी 2025 कोला लेइयै 10 जनवरी 2025 तोड़ी सयाले दियां छुट्टियां पाने दा बी एलान करी दित्ता ऐ।

<><><><><><>

IMD

भारतीय मौसम विभाग नै ओंदे 5एं दिनें दरान समूलचे जम्मू कश्मीर ते हिमाचल प्रदेश च जबरदस्त ठंडू दा प्रकोप जारी रौहने दी पेशगोई कीती ऐ। एह्दे इलावा पंजाब ते राजस्थान च बी सुक्की ठंड जारी रौहने दे आसार दस्से गे न। तोआई कश्मीर घाटी च बड़ी मती ठंड दा 40एं दिनें दा दौर जिसी चिल्ले—कलां आखेआ जंदा जंदी रातीं दा शुरू होई गेदा ऐ। इस आसे दरान सयाले दी सब्बने दा मती बर्फबारी होंदी ऐ। इस अवधि दा सब्बने शा मती ठंडू आला अरसा 21 दिसम्बर कोला 31 जनवरी तोड़ी रौहदा ऐ, जेह्दे बाद 20 दिनें तोड़ी चिल्ले—खुद 31 जनवरी कोला 10 फरवरी तोड़ी चलदा ऐ ते ओह्दे मगरा 20 फरवरी कोला लेइयै 2 मार्च तोड़ी दे अरसे गी चिल्ले—बच्चा आखेआ जंदा ऐ जेह्दे कन्नै गै चिल्ले—कला दा दौर खत्म होई जंदा ऐ। चिल्ले—कला फारसी दा शब्द ऐ जेह्दा मतलब होंदा ऐ “बड़्डी ठंड”।

<><><><><><>